

Mizo Basketball-te US coach-in coaching a pe

Wednesday, 10 November 2010 07:01 Vanglaini

Nimin tlai atang khan Zarkawt-a Recreation Centre (Basketball Court)-ah Mizoram Volleyball Association chahchhuah US Basketball coach John David Walsh chuan naupang te hnenah coaching a pe tan ta.

Nimin chhun khan Mizoram Basketball Association chuan Aizawl Press Club-ah press conference kovin JD Walsh an chahchhuah dan leh an hmalak tum dan an puang zar a, he hun hi Mizoram State Sports Council-a Secretary Pu Lianzuala leh Sr.SPO Pu C.Laltlanthanga-ten an hmanpui.

Thla hlui khan Mumbai-ah National Basketball Championship (Jr) buatsaih a ni a, Mizoram team pawh telin final an thleng. MBBA hruaituten JD Walsh hi hmuin inremna an siampui a, Thawhtanni khan Aizawl a lo thleng a, nimin atang khan zirtirna an kalpui tan. Coaching hi under 16 tana tih a ni ber a, MBBA-in coach a neihte pawhin a hnen atangin thil hrang hrang an zir bawk ang. Nitin zing lamah darkar hnih, tlaiah darkar 2 zel coaching a pe dawn a, tlai lam hun darkar 1 chu MBBA coach te tana ruahman ni a, an niin naupang hnenah zirtirna an pe chhawng leh ang. Vawiin tlai hian Babutlang-a basketball court-ah MBBA chuan programme pui tham tak buatsaih an tum nghe nghe a, JD Walsh coaching programme hawna a ni nghal ang.

Tunge Walsh?

Mizo Basketball-te coaching pe tu tur JD Walsh hi October 25, 1972 khan West Island, New York-ah a piang a, amah hi feet 6.8-a sang a ni a, High School a kal laia Mc Donald's All-American team-a tel pha a ni. USA-a College Basketball League, ngaihhlut tak (NCAA)-ah University of Maryland tan a khel thin a, an player pawimawh ber pawl a ni thin. 1991-1996 chhunga Empire State Games-ah phei chuan player mal khaia che tha ber pawl a ni a, Wally Szczerbiak leh Speedy Claxton-te tih lohah chuan point score hnen ber a ni. Mahse a hnungzang a tihnat avangin NCAA lama inkhelh a chawlhsan a, coaching lamah a lut. Coaching lamah pawh hian NBA leh WNBA (hmeichhe basketball inelna) player tam tak a lo enkawl tawh a ni.

1998 atang khan New York-ah JD Basketball School a hawng a, coaching a thiam avang hian China, Dominican Republic, India, Qatar, Taiwan leh Israel-ahte coaching pein a kalkual bawk. JD Basketball hi khawvel ram hrang hrang 10 velah kalpui mek a ni a, a hnuaiyah hian mi 18,000 chuangin basketball an zir mek a ni.